

Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsit (Kalaallit Nunaanni eqqartuussisarnermik inatsimmi malittarisassat il.il. nutarterneqarnerat) pillugu siunnersuummut missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut (Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerneqarnera

Inatsisartut aalajangiiffigisassaattut siunnersuummut matumunnga, Kalaallit Nunaanni eqqartuussivinni isumalluutinik atoriaannanngortitsisussamut aamma piffissap sulianik suliarinninnermut atorneqartartup appartinneqarnissaanut peqataasussamut, Inatsisinut Ataatsimiititaliap peqqissaartumik suliarinnissimaneranut Naalakkersuisut qutsavigiumavaat.

Siunnersuutit amerlanersaat eqqartuussisarnermik inatsisitsinni nutarterinerupput, taakkulu 2023-imi isumaqatigiissutigineqartumit, aamma Kalaallit Nunaani eqqartuussivinnut ilaatitsisumit, eqqartuussivinnut ukiunut arlalinnut isumaqatigiissummit aallaaveqarput. Taamaammat aningaasat qallunaat aningaasanut inatsisaanni immikkoortinneqareerput, aamma suliniutit massakkut aallartinneqartussanngorput.

Eqqartuussiveqarfimmik sunniuteqarluartumik peqarnissarput Naalakkersuisunut pingaaruteqarpoq, tassani piffissap naleqquttup iluani suliap imminut tunngassuteqartup aalajangiiffigineqarnissaa periarfissaassalluni, aamma taamaammat Inatsisartuni partiit siunertamut tassunga isumaqataanerat nuannersuuvoq.

Inatsisartut aalajangiinerat Inatsiseqarnermut ministereqarfimmut piaarnerpaamik nalunaarutigineqarumaarpoq, taamaalilluni siunnersuut Folketingimi suliarineqarniassammat. Tamatuma peqatigisaanik inatsisip kalaallisoortaanis oqaasertaliussat kiisalu tassunga oqaaseqaatit naqqinneqarnissaat Inatsiseqarnermut ministereqarfimmut noqqaassutigineqassaaq, taamaalilluni kalaallisut oqaasertai atuaruminarnerusumik eqqornerusumillu saqqummissammata.

Amerlanerusunik oqaaseqaateqaratik siunnersuut aappassaaneerneqarnissaanut Naalakkersuisut tunniuppaat.